

LA
CONCA D'ORO

Poesie Siciliane

di

Nino La Mantia

I° VOLUME

PRESENTAZIONE

Apprezzare l'uomo, il carattere, le doti creative di un poeta siciliano non è cosa facile, soprattutto perché il nostro dialetto presenta delle difficoltà naturali, che noi stessi, figli di questa generosa terra, spesso non riusciamo a superare.

Con Nino La Mantia i problemi del linguaggio, dell'espressione, caratteristicamente siciliana, acquistano una particolare forma, che definirei, un dialetto medio, nel senso che il poeta si esprime in linguaggio quasi « rustico », il quale interpreta fedelmente quello che è il dialetto siciliano, nella maniera più comprensibile e più accessibile all'uomo medio.

Tutta la creazione di Nino La Mantia è rivolta verso la critica stringata dei costumi e degli avvenimenti del nostro tempo alcuni sono di suo gradimento ed allora diventano cose piacevoli. Quelle spiacevoli sono creazioni ce in altri tempi sarebbero state defi-

nite delle filippiche, o, nella peggiore delle ipotesi, una spinta verso un miglioramento del costume e della vita del nostro popolo.

Nino La Mantia sembra abbia delle idee strane, ma, a pensarci seriamente, bisogna riconoscere che questa è la maniera migliore per rendersi partecipe di un mondo in evoluzione di cui Egli vede positivamente le cose buone, mentre mette in ridicolo le storture; non soltanto quelle dei poteri costituiti dello stato, ma anche e soprattutto quelle della società in cui quotidianamente vive la sua vita.

Il poeta La Mantia non è nato oggi, ma tanti e tanti anni fa, quando ancora bambino si trastullava di poetare in una forma a volte ingenua altre volte in maniera più o meno accessibile ai suoi lettori.

Le sue composizioni sono migliaia e migliaia. Il poeta ne ha scelte un gruppo che si riferiscono ad un periodo della vita interiore.

Attraverso questa prima raccolta Nino La Mantia si presenta al grande pubblico; a quel pubblico che non legge i giornali e che per la prima volta può gustare le succose composizioni del « Nostro ».

Piuttosto che continuare in questa presentazione, che da sola può valere ben poco o nulla, lasciamo il lettore la possibilità di giudicare e di conoscere quanto siano vere le affermazioni di chi lo conosce e lo stima.

Vito Palmeri

PREFAZIONE

Nino La Mantia, Poeta vernacolo spontaneo, è ricco di fantasia, ha voluto presentare un piccolo volume di versi.

Egli ha raccolto alcune poesie fra la Sua ricca messe poetica.

In questa raccolta si ha abbondante materiale per conoscere le luci e le ombre di Questo nostro Poeta popolano che del popolo ha tutta la fresca spontaneità, l'arguzia, la visione oggettiva delle cose del mondo.

La luminosità di alcune Sue composizioni è però macchiata da alcuni sfoghi retorici, ai quali il Poeta indulge specialmente nelle composizioni di largo respiro.

In mezzo a qualche poesia prettamente esilarante, vi si trova pure la lirica sentimentale, ricca di argomenti prettamente siciliani.

Ai Signori Lettori che vorranno benevolmente accogliere questo volume di versi, il Poeta sicuramente resterà grato con l'augurio che sia stato di vostro gradimento.

A Te, Amico Poeta, io manifesto intanto l'augurio affettuoso che Tu possa ancora a lungo cantare i Tuoi versi con il linguaggio siciliano di questa feconda e magnifica Isola del SOLE.

Ciccio Termini

FANTASIA DI POETA

Comu lu focu di lu Muncibeddu,
m'ardi 'ntra lu pettu la Musa mia,
scrivu li versi e po' 'ta un libriceddu
li mannu pi lu munnu a la strania,
sunnu frutti di la me fantasia,
senz'esseri pueta di valia.

Pi certi genti, scrivu lo sò versu,
secunnu lo sò diri e lu sò fari,
m'affidu sulamenti a lu me l'estru,
comu liggennu putiti valutari,
sintiti si vi piaci lu me diri,
cu la spiranza di farivi piaciri.

Ditestu l'omu brutu e vagabunnu,
di chiddi chi nun tengunu all'onuri,
ca disprizzati 'nta stu munnu sunnu,
gintazzi senza cori e senza amuri,
ditestu tutti, farabutti e latrì,
e chiddi c'un rispettanu la matri.

Scrivu puru pi certi signurini,
vistuti comu tanti masculuna,
daveru sunnu tanti culumbrini,
senza ritegnu pi la sò pirsuna,
s'accoppianu cu certi capilluni
chi fannu scuncirtari li pirsuni

Ammiru l'omu rettu e primurusu
nell'aiutari genti bisugnusi
pi chiddi chi nun fannu nuddu abusu
e pi chiddi chi su riligiusi,
scrivu versi pi artisti e littirati
e pi chiddi chi sunnu scinziati.

Cci 'nnè puru pi fimmini galanti,
beddi di facci e nobili di cori
descrivu li biddizzi scintillanti,
ca pi daveru valinu tisori
'nni scrivu pi la fimmina baggiana
la veru tipu di siciliana.

Mi piacinu li donni virtuusi,
ca sunnu sciuri di li megghiu prati,
e chiddi chi nun sunnu vanitusi,
e stannu beddi 'ncasa ritirati,
chisti sunnu li fimmini d'onuri,
divoti di la chiesa e lu Signuri.

Discrivu puru la bedda natura,
celu e mari, li munti e lacampìa,
e quannu dormu fora a la friscura,
mi sonnu sempri la matruzza mia,
e mentri sonnu, quali meravigghia,
lu cantu di l'aceddi m'arruspigghia.

LA SICILIANA

Siciliana mia, siciliana
ca di 'sta terra si lu focu ardenti,
quantu si bedda, quantu si baggiana
tu si la megghiu stidda risplennenti.

Quantu pueti cantanu pri tia,
senza bisognu di circari rima,
tu si la fonti di la puisia,
li vati ti dicantanu rigina.

Li furasteri cercanu di tia,
picchè lu sannu ca s'è giniusa,
purtari ti vonnu a la strania,
luntana di 'sta terra ginirusa.

Però, nun sannu ca puru luntana,
la casa d'idda nun la scorda mai,
nun ti 'nni jri nò. . . siciliana,
tu si la megghiu fimmina c'amai.

PARLA LA STATUA DI
DANTE ALIGHIERI

'Ntra lu caminu di la nostra via,
m'hannu piazzatu quali monumentu,
e tuttu chistu a la faccianza mia
c'avi chi soffru ccà du cincucentu.

Lassati ogni spiranza a vui ch'entrati,
gintuzzi onesti e scrupulusi appena,
picchè passannu sempri mi guardati,
diti la virità, vi fazzu pena ? !

Nun ti curari d'iddi, guarda e passa
cantai 'na vota 'ntra 'na poesia,
e mentri c'ogni cosa mi s'abbassa
la genti ccà mi guarda e passa via !

Mi ficiru 'sta razza di monumentu,
ca tutti i siri dopu chi ssù l'ottu,
fazzu all'amanti comu paraventu
e cù pascenza tegnu ù cannilottu !

E mentri chiddi scialanu d'un latu,
n'avutru accuvacciatu pi darrerri
mi fà séntiri fetu addimuratu
di certi cosi puzzulenti veri !

Cu fù chi mi piantò 'ntra chistu locu ?
c'appena è l'alba 'ntra li matinati
la testa mi s'infoca comu un focu,
pi lu gran fetu di li pisciazzati ? !

Esposto sugnu 'ntra li quattru venti,
di mia un c'è nuddu c'avi pietati,
e diri ca 'na pocu di fitenti
tramiti mia sunnu allittirati !

Oh Musa cara, amata Biatrici,
tu nun senti cchiù lu cantu miu,
sugnu di marmu friddu ed infilici,
pi chistu munnu sugnu lu scihfiu !!!

FINESTRA CHI LUCIVI

Finestra chi lucivi e cchiù nun luci,
chist'é lu signu ca tuttu finiu;
inutili chi perdu la me vuci
cantannu: « affaccia debba, amuri miu »,
si 'nni sdignò di mia 'sta donna 'ngrata
facennu certu n'avutra pinzata.

La culpa è mia ca cci desi retta
quannu cu li sò sguardi m'attirava
e si sapia d'essiri civetta,
'stu gran piaciri no nun cci lu dava
e penzu chi sa quanti sfortunati
lu stissu comu mia su destinati.

Inutili chi fazzu cchiù pruggetti,
amari cu nun t'ama è gran pazzia.
Diu mi ni scanza fimmini civetti,
megghiu lassalli ognuna 'a la sò via.
'Nni vogghiu una simplici e sincera
onesta e chi nun fussi minzugnera.

Però siddu l'incontru pri la via
ju cci lu dicu beddu chiaru e tunnu :
« li fimmineddi tinti comu tia
su sempri disprizzati 'ntra stu munnu,
sì picciridda ancora e nun capisci
ca qualchi ghiornu mali ti finisci ».

DONNA MARA E MASTRU TITTA

(*Dialugu*)

Donna Mara, sintiti pri favuri,
'ntra 'stu curtigghiu nun si pò cchiù stari,
la testa nun reggi, 'ntra tutti l'uri
si senti vostra figghia vuciari,
cuminchia cu la solita cantata
e nun s'adduna di quant'è stunata.

Si studia pri fari la cantanti,
iu vi cunsigghiu ca cci leva manu;
Sintitila !! di com'è scuncirtanti,
stunata veramenti e pari stranu,
fa certi noti, sull'onuri miu,
ca cu la senti dici: chi schifiu !!

Mastru Titta, pirchè tantu parrati ?
siti 'gnuranti, nun capiti nenti,
'ddi noti chi vi parinu stunati,
si chiamanu gurgheggi, vulgarmenti
cci lu dissi lu prufissuri, Pala
e quantu prima cantirà a la Scala.

La sentu, cānta puru 'ntra la Scala
ogni vota ca scinni pri scupari,
però, sintiti a mia, donna Mara,
vostra figghia fà veru vumitari.
Tintu scarparu e misiru viddanu,
vi parlu di la Scala di Milanu.

Sintitila. . . chi vuci aggraziata,
vi spiccica lu cori, s'ascutati;
la sentu di quant'è disgraziata,
si merita 'na pocu di lignati.
Si stà 'mparannu già la Traviata,
quannu si fà cunsunta, all'urtimata.

Cussì sul putemu arrifriscari
chiddi chi stannu dintra 'stu curtigghiu
vui lu sangu l'aviti agghittari,
ca nun sapiti di cu siti figghiu;
vuliti 'u mè consigghiu: donna Mara,
vostra figghia pò fari a lavannara.

SENZA CORI

Saria curiusu di sapìri
si tò matri ti fici senza cori,
o si l'hai, è di pietra, si mi criri,
tu muriri mi fai di scattacori.
Chi vannu 'sti biddizzi chi tu teni,
si notti e ghiornu tu mi duni peni ? !

Lu sai, ti vogghiu beni a la pazzia,
a puntu ca nun reggi la me menti,
e mentri penzu di fariti mia,
tu ti dimostri sempri 'ndifferenti !
Ju fici un vutu a Santa Rusulia,
si tu diventi mughiruzza mia !

Me matri sapi tutti li mè peni
e mi cunforta cu li sò paroli,
mi dici: d'aspittari mi cunveni,
cu sà jdda dicide ca ti voli.
Si siti pi davveru destinati,
virrà lu jornu quannu vi spusati.

Matruzza cì rispunnu: ma chi diti ?
Chista filicità nun è pi mia,
sidd'eru furtunatu mi criditi
mè patri a la miniera nun muria !!
Penza ca matrimoni e viscuvati,
sù sempri di lu celu destinati.

Matri mia picchè nun cì parati ?
Diciteci ch'è tutta la mè vita,
forsi virennu a Vui ca la prigati,
Vi runa 'na risposta chiù cumprita.
Ma si Vi dici NO': Matruzza mia,
preparati un tabbutu puru a mia !!

UN SCARPARU A CANDITATU

'Na vota 'ntra 'na lista elettorali,
mancava un nomu p'essiri cunmpleta,
pì canditatu cci vulia un tali
un'artigianu cu cirvellu di crita,
dici siru pii darici riparu,
mettiri in lista un poviru scarparu.

Un certu Don Nicola fu 'n vitatu,
ma di politica nenti sapia,
e lu mischinu s'era rifiutatu:
dicennucci: faciti fissaria,
ma chisti insisteru in maniera tali
ca a lu scarparu cci parsi veru mali.

Pò l'invitaru pii fari un cumiziu,
lu poviru nun sapia 'nzoccu diri
e privinennu qualchi pricipiziu
cci lu dissi ca brutta pò finiri,
chisti insisteru cu tanta mastria,
ca sù purtaru a la piscaria.

Ddà c'era un beddu palcu priparatu,
e lu scarparu prontu p'acchianari,
ma unu chi l'avìa già sbintatu,
cci fici un piritu di fari trimari,
lu scarparu veru spiritusu,
cci dissi: comu scinnu t'attuppu 'stu pirtusu.
Poi dissi: in modu patriarcali,
o vaiu a Roma, o puru a lu spitali.

Signuri mei, finiu malamenti,
pì comu lu scarparu prividia,
li pìrita foru tanti veramenti,
ca lu scarparu la calma pirdia,
scinnù du palcu, e all'incaricati,
cè dissi curnuti e disgraziati.

Stu fattu cci lu dissi a sò mughieri,
ca a n'atru pocu era Diputatu;
idda cci dissi: pezzu di fumeri,
comu fù cun tannu lapidatu,
lapidatu nò, iddu cci rispusi
ma li pìrita foru furiusi.

A CHIDDA CHI M'INTENNI

Chiantài un ciuri 'nta lu misi d'Aprili,
'nta Maggio mi sbucciò russy sbampanti,
'stu ciùri siti vui donna gintili,
'stu ciùri siti vui donna galanti.

La bedda littra ch'ju vi mannài
fu pi suddisfari un miu disù,
li mè pruggètti, tutti spalisài,
e la firmavi cu lu sangu miu.

Iu dintra cì alligài 'na bedda rosa
ca di sicùru vi fici piacìri,
certu chi nun è stata 'na gran cosa
però cu li mè manu la cughivi !!

Lu restu spetta a vui, si c'è da fari,
aspettu la risposta pi scialari,
fici la pianta pi vi rigulari,
ed ora spetta a vui lu fabbricari.

(In confidenza ai lettori)

Si mè mughieri di tantu s'addùna,
sicùru ca m'addubba a timpulùna.

BIDDIZZA RARA

Quànnu passu di cà passu cantànnu,
dimmillu si tu senti la mè vuci,
nun viri ca pi tia st'aiu spasimannu,
notti e ghiornu mi sentu misu 'n cruci !

Nni canuscio assai fimmini beddi,
però la tò biddizza è spiciàli,
puru chi giru curtigghi e vanèddi,
bidduna comu tia nun c'è l'eguali.

Li Fati, nun ti ponnu supirari
picchi la tò biddizza è veru rara,
tu sì 'na Madunnuzza d'ammirari
'nmenzu a tanti ciuri supra 'na vara.

Iu mi n'addugnu ca sì curtiggiata,
macari li chiù megghiu vonnu a tia,
tuttu lo jornu c'è 'na passiata
di studenti, mastranza e signurìa.

Iu scummétu ca mancu un gran pitturi
sapissi 'sta tò facci pitturari
truvàri nun putissi li culùri
pi 'sta facciùzza farla risaltàri.

Pi tia st'aiu pirdénnu pace e sonnu,
penzu sempri comu ti pozzu amari,
ma siddu li mé vezzi nun ci ponnu,
pi mia è tuttu inutili campàri ! !

FIMMINA VILI

Senza nudda ragiuni mi lassasti,
dopu dui anni ch'éramu ziti,
dimmillu si la testa ti sbintàsti,
vulennu fari ora chista liti.

Iò, t'haiu vulutu beni veru assai,
e ora tu mi metti 'ntra li guài !

Si prima ancora nun t'haiu spusata
lu sai ca la culpa nun è mia ,
è stata tò matruzza veru 'ngrata
a diri sempri: è nica Nuccia mia !
Ora, forsi, trovò 'n'atru partitu
e ti lu voli dari pì maritu.

E tu canciasti puru di pinzéri,
pi sbarazzàriti prestu di mia,
mi lu dicisti già l'avutru aeri,
ca fussi megghiu di canciari via,
nun ti criria nò, tanta leggéra
comu lu ventu, canciàsti bannéra.

Ricordati però ca mi vò mali,
dopu ca di tia mi 'nnamurai,
si tutta 'ntra u mé cori e comu tali,
mortu di pena tu mi truvirài,
ma si moru pi tia, fimmina vili,
di tia nun vogghiu ciuri né cannili ! !

LI CURNUTI VOLONTARI

L'omu, chi mancia supra la mugheri,
è sempre un gran curnutu patintatu,
campa filici e senza pinzeri,
nun si curannu s'è disonoratu,
nun sapi quannu agghiorna e quannu scura,
sulu canusci unn'è la manciatura.

Nni 'ncontru spissu di 'sti CAVALIERI,
ca fannu li signuri pi li strati,
cu li dinari vannu né chianchieri
pi s'accattari carni in quantitati,
vonnu lacerti e boni filetti,
e fumanu li megghiu sigaretti.

Di chisti ci n'è tanti conosciuti,
e di li genti sù signaliati,
li chiamanu magnacci e gran curnuti,
e marcianu macari profumati,
però, criditimi in parola mia,
hannu li corna longhi a ferrovia.

Li sò mugheri nescinu 'mpupati,
si fannu fari li megghiu tuletta,
cu li dinari di li 'nnamurati,
e li mariti nun cci stannu attenti,
ma 'st'omini sù chiddi tali e quali,
chiamati gran curnuti NAZIONALI !!

MI VOGGHIU CUNFISSARI

Chiamatimi lu Patri confissuri,
mi vogghiu a lu chiù prestu cunfissari,
fici un piccatu, piccatu d'amuri;
cu 'stu rimorsu nun vogghiu campari.

'Na picciotta mi fici 'nnamurari,
quannu lu spissu stava a lu mé latu,
lu restu nun lu pozzu spalitari,
sinnò v'avissi a diri lu piccatu.

Era bidduna, cu li trizzi scuri,
la paci m'arrubò cu d'occhi latri,
pi jdda mi scurdai lu Signuri
e chidda vicchiareda di mé Matri !

Videmu chi mi dici lu Parrinu,
qual'è la pena chi aju a scuntari,
ma si mi dici: lu tuttu è distinu,
ci rispunnu: m'a vogghiu maritari.

ESTREMU SALUTU

Rusidda, sugnu ccà, accantu a tia,
vicinu 'stu tò lettu di duluri,
tu ch'eri tutta la spiranza mia,
ora finisci ccà lu nostru amuri.

Troppu crudeli fù la sorti mia
pi 'stà tiranna e tinta malatia !!

Nun ti mancaru li chiù megghiu curi,
e l'assistenza mia in ogn'istanti,
chiamai pi tia un celebri dutturi,
e voti fici, assai, puru a li Santi !!

Pi mia nun c'è cchiù nenti di spirari,
senza di tia chi vali lu campàri !?

Rusidda guarda cca 'stu fazzulettu,
lu ricamasti tu pi dallu a mia,
ora lu strinciu forti a lu mé pettu
comu pozzu scurdarimi di tia ?!

Ti giuru, sarà bonu cunsirvatu,
picchè di li mé lacrimi vagnatu !

Oh ! Virginedda Santa Rusulia,
pietà di chiesta bedda criatura,
Tu portatilla 'ncelu assémi a Tia,
ora ca veramenti è ghiunta l'ura !!

Rusidda, sugnu ccà, distruttu e mutu,
pi dariti l'estremu miu salutu !!!

UN 13 INVINTATU

« *Ovvero j scherzi da sisal* »
(*Dialugu fra dui cumpari*)

Cumpari meo, siti furtunatu,
l'auguri vi li fazzu a beddu cori,
lu tririci c'aviti induvinatu
vù leggiu 'nfacci. . . senza fari stori.

Sta matina mù dissi mastru Brasi,
chi l'ebbi dittu di donna Cuncetta,
la vincita è grossa chi vi trasi,
ottanta miliuna 'ntra sacchetta.

La vuci si spargiù 'ntra un mumentu,
inutili vulirivi ammucciàri,
la vostra casa è tutta in movimentu
fora la robba la vitti jttari.

Ma vui un mi diciti propriu nenti,
siti virdònicu. . . l'aricchi tisi,
jò vi cunsìgghiu momentaneamente,
pigghiàtivi 'na purga di sali 'ngrisi.

Ccè aviti a diri ch'è disgraziatu,
cu vi dissi ca tridici jò fici,
dicìtici ch'è curnutu patintatu,
ca 'ntra lu saccu puru a vui vi misi !

Cumpari, nun circati di nigari,
né fari mancu cchiù la babbia,
chiddu chi vitti lu pozzu affirmari,
la robba vostra fora ammuzziddata.

Chistu lu fici lu patruni j casa,
ca mi mannò l'uscieri 'ntra un mumentu !
Oh solitu. . . sapiti unni si basa !
Sempri pì lù mancàtu pagamentu !!

Chista è 'na gran pena ca mì dati !
Cumpari miu, picchè nun v'affucati ? !

LATRU D'ONURI

Picciuttedda vagabunna,
rignedda di la strata,
cu 'sta facci bedda e tunna
rassumigghi a una Fata,
tu dimmillu bedda mia
picchè sula 'ntra 'sta via ?

Stai attenta ca la strata
è maistra d'ogni mali,
siddu fusti abbannunata,
ti disperi, e a chi vali ? !
Si qualcunu sciaguratu
disonuri ha siminatu ! !

Iò, t'incontru spissu voti,
e macari lacrimannu,
forsi penzi la tò sorti,
pi cù a tia fici dannu ?
Tu cunfidati cù mia,
sugnu sulu comu tia.

Tutti dui semu lu quattru,
di 'stu munnu scilliratu,
dimmi tu, cu fù 'stu latru,
ca l'onuri t'arrubàtu ?
'St'occhi nun ponnu mintiri,
cci léggiu lu tò suffriri !

Chistu incontru tantu stranu,
pi lu fattu assai diversu,
ora damuci la manu,
contru lu distinu avversu,
senti a mia, 'ntra li svinturi,
cci pruteggi lu Signuri !

S'APPURO' LA MALATIA

E' sugnu arrieri ccà, caru Dutturi,
e sunnu cinqu voti chi ritornu,
la testa mi fà sempri gran duluri,
cu 'stu gran pisu 'ntesta mi frastornu,
tutti li midicini chi m'ha datu,
nun mannu datu nuddu risultatu.

Mi scrivissi 'na bona medicina,
quantu 'stu pisu 'ntesta mi finissi,
mi dura sempri da sira a matina
e ogni ghiornu chi passa mi crisci,
siddu seguitu aviri 'stu gran mali,
la testa pò pisarmi un quintali.

Amicu, jù nun sacciu chi vi fari
adupirava tutta la mé scienza,
puru li raggi vi li fici fari,
e midicinali dati di cuscenza,
ju stissu nun mi sacciu rassignari
picchè 'stu pisu 'ntesta un pò passari.

Sarà 'na malatìa sconosciuta,
e all'apparenza nun si viri nenti,
un criu ca vostra mogghi è mala juta,
e vui mischinu nun sapiti nenti,
'stu pisu 'ntesta ca spissu vi ritorna,
pò essiri lu pisu di li corna.

Dutturi, chista cosa è cchiù sicura,
nun ccè bisognu di la sò bravura,
mè mogghi tempu fà a villeggiatura,
mi scrissi ca trovò 'na cugnintura,
« E s'appurò lu vostru veru mali,
chisti sunnu li corna naturali ».

VURRIA

Vurria turnàri arréri piccirìddu,
quannu iucavu dintra casa mia,
satàva sempri comu fussi un griddu,
pò m'abbrazzàva la matrùzza mia,
la bedda mati mia chi mi criàu,
e cò murénnu, nicu mi lassàu.

Vurria turnari quannu avia vint'anni,
'nto veru ciùri di la giovinezza,
senza pinzéri e senza nuddu affànni,
la vita mi passava 'na bellezza,
ma ora sugnu fattu vicchiarreddu
cu lu rimpianu di lu tempu beddu.

Vurria turnari a li beddi tempi,
quann'era zitu e lussu facia
assemi a la mé zita e quasi sempri
iàva a ballari in bona cumpagnia,
e 'ntra li trattamenti e li ballati
cì dava a la mé zita gran vasati.

Vurria turnari di friscu spusinu
ca mi sintiva ré di lu pìsi,
cu mi diciva: c'è lu signurìnu
chiddu c'abballa cu li donni lisi,
e passiànnu 'ntra strati e vanéddi
era guardatu di fimmini beddi.

Ora ch'è fari, munnazzu birbanti
si li donni mi passanu davanti,
jò restu comu Santu Libiranti,
cu l'ochci chini e li manu vacanti.
O Amuri ! Amuri tuttu mi finìu,
fimmini beddi vi dugnu l'addiu !

LU SAPI DIU COMU FINISCI

Vicinu casa mia a la cantunera
ci stà 'na picciuttedda graziusa,
chi v'haiu a diri, pari 'na bannerera,
però e t'anticchedda vanitusa,
la matina, si passu da sò via,
mi fà la risatedda e mi talla !

Essennu amica di 'na mé suruzza,
lu spissu s'avicina a casa mia,
appena ca mi viri, 'sta bidduzza,
m'attacca c'un discursu di mastrìa;
mi dici ca ci piaci lu mé fari,
travagghiaturi e di bonu trattari !

Lu sàcciu già unni voli arrivàri
e a mé suruzza spissu si la vasa,
ma ju nun mi vogghiu 'ngramagghiari
essénnu lu sustegnu da mé casa,
sacciu puru qual'è lu sò pruritu
ca mi vulissi prestu comu zitu !

S'assetta a mia vicinu, sempri accanto,
circannu di vulirisi stricari.

Signuri mei, poi nun sugnu un Santu,
si qualchi vota pozzu straviàri,
l'afferru pi sò quattru pila lisci
e pò lu sapi Diu comu finisci !

DONNA SARA LA PASTARA

Signura, ca mi manna sò cumpari,
mi dissi: l'havi asciuttu lu pirtusu ?
Sidd'è asciuttu ci lu pò prepararari
ca ora scinni iddu finu iusu.
Vossìa nun mi dicissi curiusu,
ju dicu lu spaghettu cu pirtusu !

Dicèllu a me cumpari ch'è vagnatu,
finìvi propriu ora di sfilàri,
però ci a diri ch'è disgraziatu
e cu mia avi pocu di schirzàri.
Si sò mugheri un'avi nuddu invitu,
la manna cà, l'aspetta mé maritu !

FIGGHIU DI NESSUNU

Comu n'aceddu spersu e senza nidu,
sulu suliddu sugnu 'ntra 'stu munnu,
e chianciu comu chianciri mi firu,
spargennu li mé peni sempri 'ntunnu,
nun canusciu li muini d'un patri
e li vasuna ardenti d'una matri !!

Forsi, sarò lu figghiu d'un piccatu,
chi nuddu si lu vosi cunfissari,
sarà statu n'amuri scilliratu
perciò pinzaru di m'abbannunari
detru 'na Chiesa, 'nta 'na scalinata,
comu 'na truscia di roba scirata !!

Si cuntari vurrisi li mé peni
di quann'è chi mi trovu 'ntra sta vita,
senza chi nuddu m'ha vulutu beni
senza chi nuddu lu mé nomu cita,
puru li petri avissiru pietà,
di mia chi nun conosciu felicità !!

Ed ora sugnu ccà, figghiu di nuddu,
sulu, senza famigghia, né risettu,
c'è cu mi chiama Cola o puru Puddu
c'è cu mi fà lu leccu pì dispettu,
troppu crudeli fù la sorti mia,
oh Signuruzzu chiamami cu Tia !!

CU RUMPI PAGA

Nun sugnu surdo, donna Catarina,
m'aviti dittu ca cu rumpi paga,
diciticèllu a vostra figghia Pina,
cu è chi ci rumpìu la quartàra,
picchè siddu dicìti ca fu ju,
Parma vi l'addannati 'nanzi a Diu !

Si poi criditi ca sugnu muru vàsciu,
chi m'accullàti tutti cosi a mia,
vi giùru ca jò tuttu scatàsciu,
macari ca finisci a vucciria.
Si vostra figghia è donna di cuscenza,
dicissi a cù cì ha datu cunfirénza.

'Na sira, jò la vitti a la funtana,
assémi cu 'na pocu di giuvinotti,
c'era Neli, u figghiu da mammana,
e Mommo Trìghia, 'ntisu « peri cotti »,
di pò si fici scuru tuttu paru,
e ju nun vitti chiù dunni pigghiàru.

Lu mali è vostru, donna Catarìna,
ca troppu libirtà cì aviti datu,
mé patri cunta ca vui signurina,
puru a ddì tempi aviti sciddicàtu,
perciò s'è discinnénza di famighia,
si dici: tali matri e tali figghia !

STIDDA D'AMURI

Ti ricordi ? éramu piccirìddi,
e tutti dui 'nzemi si iucàva,
ju spissu t'arrubava li nucìddi
e poi, dopu li sciàrri, ti li dava.

Ti ricordi ? e 'nzemi criscému
finu a lu puntu d'ora, semu granni
e siddu ancora beni cì vulému
fussi mégghiu livàrini 'st'affanni !

Siddu veni, la casa è preparàta,
attòrnu ddà cì trovi un pìrgulàtu,
unni filèci tutta la iurnàta
starému tutti dui, ciàtu cù ciàtu !

Di la mé casa tu sì la rigìna
e ju diventu ré vicinu a tia
abbrazzatèddi di sira e matìna,
ti vògghiu d'accussì vicinu a mia !

Veni, t'aspéttu appéna che stasìra,
a virmarià mi trovi a la trazzéra,
crìdimi st'aiu squagghiànnu comu cira,
sìddu nun veni tu, moru di pena !

Tégnu 'na chitarrédda di valùri
pì quannu cantu a tia : Stidda d'amuri !

DIALUGU FRA DUI CUMMARI

Cummari, aviti vistu a mé maritu ?

Gnursi, vinni nì mia, di passaggiu,

lu sapiti, jò soffru di pruritu,

lu prigài di fàrimi un massaggiu,

jddu, avi un'nguentu ca lu sacc'ju

ch'appena ù metti passa lu manciu.

Cummari, ora comu vi sintiti ?

scumméttu ca ù manciu v'è passàtu,

però vi dicu, siddu mi criditi,

'stù manciùmi mi pari esageràtu,

lu 'nguentu chi teni mé maritu

servi pì mia, l'aviti capitu ! !

Cummàri, comu siti pillicùsa,

a mé cumpàri, nuddu si lu pigghia !

invéci mé maritu cu 'na scusa,

lu spissu, veni a truvàri vostra figghia,

'ntra 'stu curtigghiu, parola d'onùri,

pari ca semu tutti d'un culuri.

Aviti ragiùni, cummari mia,

lu fattu è veru, semu 'mpirugghiati,

lu vicinatu sempri furbicia

virennu comu semu cumminati,

anzi vi dicu, semu signalati,

'ngarzzati tutti, schetti e maritati.

LA MIA VECCHIA BALIA

Un ghiornu mi trovava a passiaru
beddu linnu, 'ntro Corsu principali,
e lu distinu vosi d'incuntrari
'na fimmini davveru spiciali,
guardannula, pi biddizzi ch'avìa,
la canuscivi pi la Balia mia.

Lu pettu lu tiniva trasparenti,
guardannula faceva dilirari,
pi strata si vutavanu li genti,
vidennu ddi gran puppi di scialari,
era grannuzza; ma lu pettu chinu,
l'avvicinai; cci fici un'inchinu.

Di poi, cci dissi: Signura stimata,
mi conosci? iu sugnu Ninu Scatti,
lu figghiu da signura Sbaracata;
chiddu, chi lei mi desi tantu latti,
guardu 'sti puppi sò, Signura mia,
pò grapiri 'na nova latteria.

Mi ricordu! comu si fattu beddu!
lu latti miu è chiddu chi sazia,
tu t'appuzzavi comu un ciaraveddu,
ora, dimmi, chi voi tu di mia?
Che vuliri, cu 'sti minni di fora,
mi veni vogghia di sucari ancora!!

UN MARITU LAGNUSU

Cummari mia, chi vi pari nenti,
mé maritu si scrissi o Sindacatu
di chiddi chi sù a spassu permanenti,
ed è perciò ca ora è sistematu,
lu sò travàgghiu in tuttu si ridùci
in tutti i scioperi, ittàri vuci.

'Stu travàgghiu cì dura eternamenti,
picchè li scioperi sunnu tuttu l'annu,
è puru assicuratu, giustamenti,
siddu chi sà ricivi qualchi dannu,
picchè, cù sapi, menzu lu frastònu
si rùmpiri cì ponnu qualchi cornu.

Pi jddu, veramenti cì vulia,
'stu maritu, nun fà nenti mai,
jddu è lu ciùri di la lagnusìa,
e malidìcu quannu lu spusài,
jò, pi campàri a jddu a la jurnàta,
mi tocca fari sempri la criàta !

Però, cummàri mia, qualchi ghiurnata,
mu viu arrivari mali cumminàtu,
cù l'ossa rutti e la testa fasciàta,
o puru all'uspitàli, stinnicchiàtu,
allura cì dicu, ddocu a cripàri,
mentri ca ti siddìa di travagghiàri.

Siddu cripàssi, fussi a mé ricchezza,
mi dispiàci c'avemu trì figghiòli,
ca nun ci ha fattu mai 'na carizza,
e quannu sù vicino nun li voli,
a mia sulu mi fà li sò minzìgghi,
e mi fà sdivacàri sempri figghi !

LU FINANZIERI

Oh quantu sù beddi li Finanziari,
diceva donna Mara a donna Lisa,
'nta lu cappeddu portanu alteri
'na bedda pinna chi 'sta sempri tisa,
iò mi ricordu di li Finanziari,
ogni vota chi passavu li barreri.

Vulevanu sapìri chi purtava
'ntra lu panaru c'aveva cu mia
e qualch'unu mi lu scummigghiava
dicennu: quanta roba di valia,
pò n'avutru faccia qualchi assaggiu,
e pò mi dava libero passaggiu.

'Na vota canuscivi un Brigadieri,
chi faceva serviziu a la barriera,
mi pirquisìu davanti e pi darrereri,
ma ancora pirsuasu nun si era,
mi dissi: scusassi, cara signura,
vinissi ccà, la guardu un pocu nura.

Di pò cu tempu mi lu fici amicu,
e jò passava chiddu chi vulìa,
è tutta virità chidda chi dicu,
pirdia la testa appena mi virìa,
era beddu, pariva 'na bannera,
e ju a lu spissu jàva a la barrera.

Quann'è chi vannu in qualchi rivista,
cu la divisa stirata e linna,
sbagliari nun si ponnu a prima vista,
pì prima cosa cci spicca la pinna,
si mi criditi, cummaruzza Lisa,
cci la vasassi chidda pinna tisa.

UN CUNSIGGIU

Giovanottu, vi parru comu matri,
vi cunsigghiu spusarivi a mé figghia,
la mischinedda èorfana di patri,
però è 'na ricchezza di famigghia,
avrà qualchi difettu curiusu,
ma vui pì chistu siti ginirusu.

D'un occhiu addirittura nun cì viri,
di l'avutru ci cuva 'n'atru mali,
però veni difficili a scuprìri
picchè 'sta sempri misa cù l'occhiali,
camìna poi un pocu zupparédda,
picchè nica cadìu da siggitédda.

Capìddi n'havi pocu, quasi nenti,
però sunnu di moda li parrùcchi,
la puvirédda è puru senza denti
e quannu mancia lu tuttu s'agghiutti,
avi la gobba un pocu spurgenti
ma poi grazie a Diu nun avi nenti !

Ma vui nun dicìti 'na parola,
aviti 'ntisu li discursi mei ?
Signura 'stu cunsigghiu mi cunsòla,
ma prima, giustu parru cu li mei,
e mentri ju paru cu la mé famiglia,
vautri iccàti sangu, matri e figghia !

'NA MISSA DI SUFFRAGGIU

Cummari, si dumani cci viniti,
fazzu diri 'na missa a mè maritu,
ogni tantu cci voli, chi vuliti:
pinzai di passarvi st'invitu,
'ntra 'na missa e li visiti a la fossa
a mè maritu cci arrifriscu l'ossa.

Cummari, cci vinissi, ma li farsi
li viù a lu tiatru sulamenti,
ma fora 'sti ridiculi cumparsi
sù comu fari ridiri la genti,
'stu luttu, lu purtati a lassa e pigghia,
a secunnu l'affari di famigghia.

Iò v'intennu a chiddu c'alluditi,
ma 'u primu amuri nun si scorda mai,
lu penzu sempri, siddu mi criditi,
e mi divertu p'un pinzari a guai.
Lu primu amuri, è chiddu chi pinzati,
ma prima d'iddu, avistuvu a me frati !!

Ma chidda fù 'na cosa di passaggiu,
era carusa, nun sapeva nenti,
Ma quannu pò facistivu a billaggiu
vi 'nni sapeva quattru, pirmanenti,
cummari, nun tuccamu chistu tastu
ca la bon'arma era veru crastu.

Ora basta, la missa è preparata,
fici mali d'invitari a vui,
e si m'a penzu, l'ordinu cantata.
E una 'mprosa, d'accussì sù dui.
Cummari, j manu mi fannu pruritu,
vi smennu, pri l'arma di mè maritu !!

Chi arma avia ? di focu o tagghienti ?
lassatilu stari unni riposa.

Ma daveru siti cumprumittenti,
'nzurtari a mia ca sugnu 'na rosa !!
Spampinata a troffa di luppini,
comu l'amanti c'aviti a duzzini.

LU GUARDAPORTA MIU

Ci passu accantu e sempri mi saluta,
mi dici spissu, vossia benedica,
si portu qualchi paccu mi l'aiuta,
e poi ritorna a la sò lòggia antica,
poi m'accompagna puru tutti l'uri,
sidd'è c'acchiànu 'ntra lu ascinzùri.

Oh guardaporta chi 'ntra la iurnata,
tu viri tanti genti di passàri
allégri o puraménti scunsulàta,
sulu cù tia méttinu a parrari,
c'è cu ti dici cosi d'alligrìa
c'è cu li peni ti li cunta a tia !

Tu sai certi misérie di la vita,
puru conùsci ricchi blasunàti,
tu sai qual'è la signurina zita,
e quannu acchiànanu l'innamuràti,
certi voti p'un luttu inaspittàtu,
ti spetta chiùdiri lu purticàtu.

Un gniornu, forse tu m'è pinzirài,
quannu 'stu munnu mi tocca lassàri,
un ultimu salutu mi darài,
e lu purtùni chiusu lu fà stàri,
ma sulu p'è trè ghiorna sulaménti,
e poi tuttu ritòrna indifférenti !

L'ULTIMA SCENA

Quannu Diu, lu munnu vosi fari,
spirava di criari fratillanza,
sempri attornu suleva pridicari
rispettu, amuri e pirsiviranza,
ma nun crideva d'aviri criatu
un munnu falsu, vili e scilliratu.

Cos'è la vita si mi dumannati,
ju vi rispunnu senza difficoltà,
sunnun tanti sceni ammunziddati,
chi ricitamu tutta l'umanità,
si tratta d'una farsa intercalata
cu qualchi dramma di vasta purtata.

Gilusia, avarizia soprusi,
'nvidia, superbia, tradimenti,
e tanti avutri cosi vriugnusi
sù di 'sti sceni li cumpunimenti,
chi 'ntra la vita, nui tutti murtali,
pirdemu lu dicoru e la murali.

E 'nmezzu 'stu miscugghiu di scinati,
passa la vita e nuddu si n'adduna
ca li jorna nostri sunnu cuntati,
pirchè la morti a nuddu la pirduna,
non vali nenti tanta spirienza
ca nun ccè nuddu chi la morti penza !

Oh ! quant'è buffa pò l'ultima scena,
ch'è chidda chi cci porta a lu trapassu,
unu cu l'autru 'nni facemu pena,
e chiddu chi dicemu è tuttu falsu,
lu finali e lu fintu rimpianu
mentri lu mortu trasi 'ncampusantu.

L'EREDITA'

E semu tutti ccà, caru Nutaru,
pi comu ci chiamò vossignurìa,
semu l'eredi di don Titta Faru,
ddu galantomu di Pantiddarìa.
E' stata una gran pena ca muriu
pirch'era un santu e l'à vulutu Diu !

Era beddu ed era affizziunatu,
quannu ci penzu chianciri mi veni,
lu spissu mi vuliva a lu sò latu,
giurari pozzu ca mi vuliva beni,
poi mi diceva, tu nun dubbitari,
qualchi cosa ti la fazzu maniari.

Iò sugnu lu parenti cchiù vicinu,
picchè sò zia era la parrina
di la cugnata d'una mé vicina
ch'era niputi di mé frati Ninu.
All'autri nun dassi gran 'mpurtanza,
picchè sunnu parenti in luntanza !

Cà c'è lu tistamentu e si cumponi,
di 'sti dui busti chiusi e siggillati.
Vi raccumannu calma, stati boni
ca soccu leggiu vogghiu c'ascutati :
C'è scrittu in una debbiti a pagari
e la secunna quantu aviti a dari !

Basta Nutaru. . . nun liggissi cchiui,
quann'era 'nvita 'stu disgraziatu,
diceva sempri chi pinzava a nui,
invece ora debbiti ha lassatu ! !
E ju cretinu mi vistivi a luttu
pi 'stu gran mascaratu e farabuttu !

Ora ccì vaiu supra la balata
e ci fazzu 'na bona pisciazzata.

LU VECCHIU PICURARU

O picuraru c'à lu munti vai
a pasculari lù tò beddu armentu,
sona lu friscalettu si cci l'haj
e sonalu c'amuri e sintimentu,
quann'ju picciottu java a la muntagna,
pri mia era festa, era 'na cuccagna.

Mi ricordu ca sunava
li mutivi appassionati,
e li fimmineddi amati
ci piacìa lu trullallà
a la mannara facia
lu gran sieru e la quagghiata
a la fimmina sciacquata
cci 'nni dava 'nquantità.

Ah ! si putissi arreri riturnari
'ntra chiddi lochi tuttu puisia,
sintissi lu mé cori riscialari
'ntra chiddi munti e 'mmezzu ddà campìa,
ora finiu pri mia la vita bedda
vicinu a la mé bianca picuredda.

Mi ricordu picciriddu,
'ntra li pecuri e l'agneddi
é 'ntra fimmineddi beddi
mi sinteva gran Pascià.
Ora sugnu vicchiareddu,
cechiù nun pozzu caminari
e mi tocca di campari
troppu afflitu in verità.

LU SBARCU DI L'AMERICANI IN SICILIA

Quannu sbarcaru ccà l'Americani,
'ncasa mia c'era l'abbunanza,
di manciari ci 'nn'era a scatulami,
e tutti cosi di vera sustanza,
a mé mughheri, nenti cci mancava,
e notti e ghiornu, davveru scialava.

Alcuni Americani, in casa mia,
ristavanu cuntenti veramenti,
mé mughghieri, cu tutti sà facia,
e li trattava comu sò parenti,
e siccomi gran beni cci vulia,
cci lavava puru la biancherìa.

Spissu, a la sira puru s'abballava
limgghiu balli, la Samba e lu Spirù,
e certi voti mentri si ballava,
a mé mughieri nun l'ha truvava cchiù.
Pò riturnava tutta all'intrasatta,
dicennu, ch'era bedda sodisfatta.

Quannu l'Americani si 'nnieru,
mé mogghi rimasi siddiata,
si vi lu cuntù, nun vi pari veru,
mé mogghi avìa la panza già vunciata,
jò ccì dumannai: chi cosa hai ???
idda rispusi, forsi manciai assai !!!

Invece mé mugheri era incinta,
e a novi misi appi un nutricheddu,
di nun sapiri nenti, jò fici finta,
però nascìu un beddu turchiceddu,
era nivuru comu lu carbuni,
ed iu nun sapeva la ragioni,

Mé mogghi forsi fu impressiunata,
di qualchi nivuru americanu,
e vulennucci fari cosa grata,
lu vosi cuntintari tuttu sanu,
lu guaiu è ora: comu cumminamu,
a parrari cu stù nicu amiricanu !!

Quannu è granni e parra cu nuatri,
jò cci dicu: và cèrcati a tò patri !!

MI LU VO' DIRI.

Mi lu vò diri almenu chi ti fici,
ca mi lassasti senza 'na ragiuni,
lu tò curuzzu è niru comu picci,
ed ingannari sapi li pirsuni,
'nta chisti tu 'ngannasti puru a mia
dopu chi tuttu dedicavi a tia.

Scurdari mi facisti patri e matri,
veri titori di la vita mia;
li fimmini accussì sù tanti latrì,
digni di stari 'nta la vicaria,
tu pi cinc'anni mi tinisti a lenza,
ed ju, cinc'anni a darti cunfidenza.

L'amici mi dicevanu chi fai !!!
nun viri ca t'allonga la curdedda,
è capricciosa e forse tu non sai
com'è lu spassu di la sò vanedda,
si spassa cu mastranza e signurìa,
e pò ti dici ca ti voli a tia.

Ora ca vitti tuttu lu finali;
mi dasti prova d'essiri civetta,
li tò paroli nun foru liali,
ed ju sinceru ca ti davu retta,
dopu cinc'anni darimi lu sfrattu.
ricordati lu tortu chi mà fattu

Ed ora nun ti sai disculpari,
né mancu dù paroli tu mi scrivi,
ma lu Signuri t'avi a casticari,
pi lu gran mali, jò, chi ricivivi,
ma si torni a vulirmi cunsulari,
jò t'amu tantu, di ti pirdunari.

LU RICATTU

(Dialugu)

Signura, si mi duna 'na vasata,
senza chi sapi nenti sò maritu,
jò, nemmenu cci fazzu 'ddà 'mbasciata,
ca jeri la 'ncucciai cù don Vitu
e si vasati mi 'nni duna dui
mancu cci dicu 'ncasa a ccù s'inchiu.

Ma siddu nun cuntenta puru a mia
parola c'haju cosi di cuntari,
'cc'è Turi Nasca e Minicu Cudia,
ca cu vossignuria hannu da fari,
di pò 'cc'è puru mé frati Pippinu
e Titta Brogna, 'ntisu malantrinu.

Chist'è ricattu, chi vuliti fari
ma nun é giustu cu 'na donna onesta ! !
Signura, un mi facissi scatasciari
prima ca nesciu fora di l'ammesta,
dumani sira avi 'na puntata
dintra l'albergu di Masi Quagghiata.

Ma vui allura mi pirsiquitati
e v'intricati 'ntra li fatti mei.
Signura, pri cci diri a veritati
di vasuna mi 'nn'havi a dari sei,
pri quantu sù l'amanti chi canusciu,
e mi li dassi, nun facemu scrusciu.

Ma vui mi ricattati veramenti,
lu sapiti ca siti 'na mignatta,
e tantu pri lassarivi cuntenti
vi 'nni dugnu 'na duzzina esatta,
si casu mai, 'nni sapiti ancora
sugnu pagata pri dintra e pi fora.

Signura, m'ascutassi chi cci dicu,
è megghiu ca mi metti puru a nota
e si mi tratta comu veru amicu
mi metta a turnu pri n'avutra vota.
Vi dicu sì pri nun vi dari peni,
jò 'ntra 'stu munnu, fazzu sempri beni.

A LI CIURI

Ciuri ca cu lu ventu v'annacati
e annacannuvi annacannuvi riditi,
di notti ca fà friddu v'ammucciati,
a testa sutta, pari ca durmiti.

Comu spunta lu sulì v'addrizzati,
cu l'acquazzina cchiù beddi pariti
vui siti preggju granni di li prati
pirchè d'oru e d'argentu li vistiti.

Vi cantu cu trasportu pirchè sentu
pì vui ciuriddi dintra l'arma mia
lu chiù nobili e forti sintimentu,
vui m'inspirati veru puisìa.

Sulu vi cantu pirchè sentu affettu,
in vui la paci trovu e lu mé briu,
e vi cantu, vi lodu pì diletto,
siti cunfortu di lu cori miu ! !

UN CUNCERTU MUSICALI

Na vota 'nta la festa d'un paisi,
c'era pronti un cuncertu musicali,
'nta lu palcu, la genti attornu misi,
aspittavanu l'ura du signali,
pì prima cosa c'era: Traviata,
un pezzu pì la genti emancipata.

Però lu cumitatu, pì scialàri,
vulènnu priparàri cosi fini
ai mùsici prima d'incuminciari,
offriva pasticciotti e bocconcini,
e cì 'ni desi tanti in abbunanza,
a puntu d'abbuffarici la panza.

Però, la crema era avariata,
dopu un pocu l'effettu si sintìa,
e prima d'attaccari la Traviata,
a tutti cì smuvìu la diarìa,
macàri lu maïstru direttùri,
'nta la panza cì vinniru dulurì.

Tempu nenti lu palcu disirtaru,
circànnu in ogni locu un gabinèttu,
lu Direttùri circànnu ripàru,
dicèva ca mancàva ù clarinèttu,
tinènnusi li brachi e la marsina,
iàva circànnu puru 'na latrina.

Lu publicu rimàsi scuncirtàtu,
virènnu tirminàtu lu fistinu,
si ribbillàru cu lu cumitatu,
ca fù lu rispunsàbili pì primu,
ddu cuncertu, aspittàtu cu priu,
lu tuttu a frìschì e pìrita finù.

CARA MAMA'

Un maritu, cci dissi a ssò muggheri,
leggi 'sta littra chi mannò tò figghiu,
mi pari ca fazzu frutti pinzeri
ò puramenti qualchi sbugghiu pigghiu,
'sta Laura, à mia nun mi cunvinci,
dimmillu tu, si cosa 'nni capisci.

La matri, leggi lu sò cuntinutu,
pri sapiri lu chiddu chi dicia,
mentri lu patri fermu e cuntinutu,
cci dissi: ma lu senti, mogghi mia,
ora sintiti 'nni la sò stisura,
'nzocch'è chi scrissi a li genitura.

« Cara mamà: Esami supirati,
a Laura la tegnu già cu mia
pri Sabatu, speru ca m'aspittati,
facemu tutti festa, 'ncumpagnia,
ora, ca dicisi lu me mé distinu
bisogna fari daveru fistinu.

L'obbligu miu, è all'Università,
la Laura, mi vinni all'intrasatta,
ora chi l'aju è na felicità,
è vi la portu, dopu cosa fatta,
dopu tantu studju ch'aju sgubbatu,
'stu premiu mi laju miritatu ».

Mitemuni d'accordo,
cci dissi lu maritu,
'sta littra un mi cunvinci
mi sentu rimbambitu.

Mi pari, ca tò figghiu,
bussannu chista porta
nun sarà sulu, certu
'na fimmina 'nni porta.

Chi dici, scrianzatu,
tu si vecchju baccalà,
la Laura chi porta
è di l'Università.

Si tratta d'attistatu,
di la giurisprudenza,
di pò, si fussi donna,
usamucci climenza.

Lu Sabatu, di sira
lu figghiu arriva 'ncasa,
'nzemi cu 'na picciotta
frisca comu 'na rosa.

Lu patri, comu vitti
dda bedda, tutta modi,
dissi: chista è Laura,
cu trenta e cu la lodi.

VINT'ANNI

Chist'è la primavera di la vita,
si vivi senza peni e senza affanni,
si prova la passioni cchiù 'nfinita,
ca certi voti porta disinganni,
vint'anni, sunnu si piriculusi
quannu si tratta di fatti amurusi.

La picciuttanza nun avi timuri,
nun sapi ca vint'anni su lu spassu
di chiddi nati pri dari turturi,
capaci di purtari a lu trapassu,
l'amuri fà cummetterli stranizzi,
ca dopu tempu pò vennu li sbrizzi.

Omini e donni ca vint'anni aviti,
parru cu chiddi chi vi 'nnamurati,
prima ancora ca 'stu passu faciti
attenti siddu mali 'ngramagghiati,
siddu la scelta nun sapiti fari,
lu malu passu sulu pò ristari.

'Na fimmina di lu mè vicinatu,
'na carusa ca vint'anni un'avia,
s'innamurò d'un giuvini spusatu,
e tempu nenti ficiru la via,
senz'essiri spusata; pò la lassò,
ma jdda un ghiornu, pì strata l'ammazzò.

Citu 'stu fattu, ma 'nni sacciu tanti
picchè li leggiu supra li giornali,
ed è perciò c'avvertu tutti quanti
ca l'epuca è currutta e triviali,
omini e donni c'aviti vint'anni,
guardativi di tutti li malanni.

LA PILLULA PROIBITA

Aveva 'na spiranza sulamenti,
di mé muggheri nun fari cchiù figghi,
cu la pillula tantu surprinmenti
purtassi lu cunfortu 'nta famigghi,
però 'sta spiranzedda è già finita,
picchè la pillula fù proibita !

Mé mogghi di natura figghiulina,
di figghi mi 'ni duna veru assai,
picca 'ci voli e cuntu la duzzina
tinennumi lu spissu 'nta li guai,
ed ogni sgravu, sempri si cunchiui
di sdivacalli spissu a dui a dui !

Aiu fattu rimedi d'ogni latu
m'ha statu tempu persu pi davveru,
la pillula m'aveva rinfrancatu,
dicennu: ora sugnu a postu veru,
ma lu cuntu mi vinni sbagliatu,
e senza pillula sugnu ruvinatu.

Si vurrissi sunari ritirata,
sugnu picciottu e nun lu pozzu fari,
si la natura d'accussì è criata,
mi tocca sulu di mi rassignari,
si mé mogghi s'avissi a lamintari,
cci dicu: bedda mia, nenti da fari !

La liggi nun permetti cosi falsi,
perciò è tuttu inutili spirari,
tutti 'sti spirimenti sunnu farsi,
ca puru drammi ponnu divintari !
Di la natura, nenti chiù si muta,
e quantu semu, lu Signuri aiuta !

PARRU PI CERTI FIMMINI

Lu matrimoniu è ritu d'impurtanza,
un giuramentu fattu 'nanzi a Diu,
un'allianza di amurusanza,
pi dui c'hannu lu stissu disù,
di chistu vogghiu fari un chiarimentu
pi li fimmini di pocu sintimentu.

Cci sunnu donni veri capricciosi,
di facili costumi e d'onuranza,
ca certi voti cridennusi dilusi,
vonnu pruvari n'otra allianza,
si scordanu lu sacru giuramentu,
tradennu lu maritu 'nto mumentu.

Cci 'n'è certuni c'hannu puru figghi,
ca nun li curanu mancu un'istanti,
ed invece di fàrici 'mminzighi,
passanu tempu cu li spasimanti,
e lu maritu, certu nun capisci
ca la mughheri, spissu lu tradisci.

Ora avvertu, cu l'omini parrannu,
si siti già spusati, stati all'erta,
ca la fimmina è sempri gran malannu,
e quannu sgarra dati la disdetta,
nun fati nuddu fattu criminali
picchè la libertà, assai vali.

Lassatili, truvannu la maniera,
ca fimmini ci 'n'è ogni cantunera.

FINISTREDDA CHIUSA

'Na finistredda pì sempri s'è chiusa,
nuddu s'affaccia cchiù, tuttu finiu,
di ddà nun chiamu 'chiù la mé amurusa,
picchè d'un mali tintu mi muriu,
lassannumi suliddu abbannunatu,
cu lu curuzzu miu marturiatu.

Idda, rapprisintava la mè vita,
essennu sulu e senza genitura;
dintra stu pettu la tegnu sculpita
st'ancilu di buntà: è ppì vintura
un fazzulettu sò tegnu sarvatu,
ca mi lu desi di lacrimi vagnatu.

Muriu comu una capinera,
'ntra li mè vrazza ancora trimulanti,
e finu ad oggi pi la granni pena,
un passu di 'dda strata un sulu istanti,
nè mancu 'dda finestra chiù m'attira,
dunni 'affacciava 'dda facci di cira.

'Ntra lu littinu sò chinu di rosi
vagnati di mè lacrimi cuenti,
nun sacciu si cci dissi tanti cosi,
picchè pirdùti avìa li sentimenti,
ricordu sulu ca mi la vasài,
dicennu: 'mparadisu ti 'nni vai.
Ed ora v'haju spissu 'o cimiteru,
'cci portu crisantemi e rosi bianchi,
pì mia finìu lu munnu tuttu 'nteru,
di chianciri chi st'occhi sunnu stanchi.
Signuruzzu ca 'ncelu la tiniti,
chiamati puru a mia si lu vuliti.

OCCHI BEDDI

Ss'ucchiuzzi vostri sù 'nà calamita
c'attiranu cu è chi vi talia,
sunnu lucenti e chini di vita,
digni di madrigali e poesia,
ispiratrici sù di veru amuri,
nun li pò fari mancu un gran pitturi.

Cu ss'occhi vui spizzati cantuneri,
cu ss'occhi vui sparati scupittati,
'ncantati paisani e furasteri
ca di passaggiu sù di 'sta citati,
sunnu d'ù stiddi rubati di lu celu
pri fari lustru a tuttu l'emisferu.

Ss'occhi fannu daveru suspirari,
d'ammaliari hannu lu putiri
lu Signuruzzu vi li vosi fari
pri quantu cu vi guarda pò gudiri,
ss'occhi vostri di veru simpatia,
l'havi a pruteggiri Santa Lucia.

'NA CASA DI MUSICISTI

(Dialugu)

Signura, vegnu ccà, drittu filatu,
siddu pozzu riciviri l'onuri,
di sò figghiuzza sugnu 'nnamoratu;
e mi presentu; sugnu profissuri,
profissuri di musica, s'intenni
siddu sò figghia puru mi pritenni.

Mi cridissi; signura Biatrici,
ju guadagnari mi sacc'ju lu pani,
s'informi cu priuri da Matrici,
ca cci v'ha sonu sempri li campani,
si ssò figghia st'onuri mi l'accorda
maistru sugnu di strumenti a corda.

Mé figghia, sempri l'ha disidiratu,
farisi zita cu unu di chisti,
giustu, appuntu lei ha induvinatu,
cca dintra semu tutti musicisti,
mé maritu, 'ntra 'banna comunali,
è chiddu chi ci porta li fanali.

N'avutru figghiu miu; menti fina,
la musica, iddu mancu la talia,
'a memoria sona li piattina,
d'annu corpa c'ognun s'arriquia
'na sira 'ntra la « *Forza del Destinu* »
arristò, 'mmanu cun sulu piattinu.

Pò ccè mé figghiu, lu nicareddu,
la musica pigghiò cu veru affettu,
havi sett'anni, chistu murvuseddu
è già sapi sunari 'u friscalettu;
casa di veru musica 'nni mia,
cci mancava sulu vossignuria.

In ultimu pò ccè l'impruvvisata,
d'una cosa chi nun s'è vista mai,
'na fimmina rimani immurtalata,
pirchè la musica cci piaci assai;
in sigretu. . . Mé figghia Ciccinedda,
sapi sunari puru a Ciaramedda.

SCUMUNICATA

Ti vitti nà la Chiesa agginucchiàta,
cri vicinu l'Artàru maggiùri,
prigàvi cu 'stà facci scunsulàta
e 'st'occhi beddi chini di dulùri.

Guardàvi sempri 'na lampa addumàta
ca c'era misa a tàgghiu a lu Signuri,
e dopu ca finìsti di prigàri,
lu parrìnu ti vinni a cunfissàri.

Ci lu dicìsti a lu cunfissùri
ca sugnu pazzu e vògghiu beni a tia ?
Ci lu dicìsti ca tu nun mi curi
e nun t'impòrta di la mè pazzia ?

Si cì cùnti li peni di 'st'amùri,
tuttu lu chiàntu di l'armùzza mia,
lu cunfissùri, dopu ca ti sénti,
nun ti li duna chiù li Sacraménti !!

LU SURDATU RIFORMATU

La settimana scorsa 'o mé paisi
liggivi manifesti 'ntra li strati,
chiamavanu surdati pri tri misi,
cumprisi puru chiddi riformati,
appartinennu 'a 'sta categoria
dissi: stavota spettu puru a mia.

All'indumani eru preparatu,
'mpalermu mi duveva prisintari,
'a mé muggheri avja raccumannatu
di scriviri, e di nun mi scurdari,
quann'è ca fui a destinazioni
mi dettiru taluni istruzioni.

M'affidaru 'na scupa, un catinu,
un spuntuni di ferru e 'na scupitta,
dicennumi ca giustu ogni matinu
duvia puliri 'nterra e la suffitta,
li dormittoi, lu bagghiu e la cucina,
cumprisa giustamenti la latrina.

Allura, cci rispusi a lu sergenti,
ju chisti cosi nun li sacc'ju fàri,
in casa mia 'sti cosi impillenti
li fà mé mogghi ca li sapi fari,
perciò si lei si metti 'stu pinzeri
ju mannu a chiamu prestu a mé muggheri.

Vinennu jdda ccà fà pulizia
macari ca cci sunnu riggimenti,
si duna gran da fari e cu mastria
in ogni cosa vi lassa cuntenti,
si lei la prova, in parolia mia
si teni a idda, e pò mi lassa a mia.

QUANNU TI CANUSCIVI

La prima vota chi ti canuscivi,
eri acchianata supra 'na ficara,
e mentri chi li ficu ti cughhivi,
ti vitti chini n'atri d' panara.
Ti dissi: Signurina, santu Diu !
s'un sbàgghiu lu patruni sugnu ju !

N'avutra vota, 'a tempu di vinnigna,
ti prisintasti di prima matina
ca scusa di vuliri quattru ligna,
ti cughhisti un panaru di racina,
ti dissi: li patruna quantu semu ?
E tu mi rispunnisti: pò viremu.

Si ti ricordi, pò n'atra matina
vinisti pri vuliri quattru ciuri
assemi cu 'na rosa maiulina,
e jò ti dissi: rigalu d'amuri ?
e tu mi rispunnisti . . .pri tò norma
'sti ciuri cci li portu a la madonna.

L'ultima vota 'ntra lu mé jardinu
vinisti, ma però nenti cughisti,
nenti c'era, e tu pri lu currivu,
a lu mé latu stritta ti mittisti,
di cogghiri l'avevi 'nfantasia,
e tempu nenti ti cughisti a mia.

AVVISI ECONOMICI

Autista con patenti
praticu investimenti,
cerca postu quantu ogn'ura
pò ammazzari criditura.

Ladru di professioni
scassa cu pricisioni,
vuluntà nun cci 'nni manca
v'ha circannu postu in Banca.

Signurina altulucata,
bisugnusa divintata,
cerca nobile disposto
di mittilla arreri a postu.

Signurina sfacinnata
nun né schietta né spusata,
v'ha circannu cugnintura,
stanca di la sò svintura.

Cammarera tuttu fari
menu chiddu j travagghiari,
cerca postu sulamenti
pri nun fari propriu nenti.

Professuri di latinu
s'è spugghiatu di parrinu
cerca donna di cuntregnu
senza c'avi nuddu impegnu.

Buona sarta diplomata
di Parigi riturnata
cerca stanza indipendenti
quantu spoghgia li clienti.

Anziana sittantt'anni;
senza debiti e malanni
v'ha circannu giuvinottu
pri cci fari 'u pani cottu.

Gentiluomu decadutu
ca nun trova nuddu ajutu,
cerca donna benistanti
pri tinilla comu amanti.

Chiromanti spiciali
induvina beni e mali,
vi ricivi a tutti l'uri
'ntra 'u curtigghiu Riaturi.

Ragiunieri diplomatu
sempri a spassu abituatu,
chista vita nun supporta
cerca postu j guardaporta.

Guvirnanti furastera
chi s'adatta a cammarera,
pri mittirisi 'o sicuru
v'ha circannu un'omu sulu.

FIMMINA SCILLIRATA

Vaju circannu li paroli adatti
quantu scrivu un sunettu di sdegnu,
jò vogghiu chi lu sannu tutti quanti,
d'un fari cosi tinti mi trattegnu,
pi causa di 'na donna scillirata,
dopu chi la livài di mala strata.

Si fici chistu, lu fici p'amuri,
picchè davveru ci vuliva beni
essennu sula e senza ginituri,
aggivulari vosi li sò peni,
dintra la mé casuzza la purtai,
e dopu pocu tempu la spusài.

Dopu sei misi appena, chist'arpia
scappò di casa senza 'na ragiuni,
riturnari jdda vosi a la sò via,
pi bazzicari li peggju pirsuni,
'na cosa sula, ora mi dispiaci,
c'a lu mé cori ci livò la paci.

Nun vali la pena di circarla,
né mancu rivulgirimi a la liggi,
è disonuri a casa ripurtarla,
pi certu poi ripetiri litiggi.
Siddu ci piaci 'sta vita libirtina,
un gniornu sintirò la sò ruvina !!

Li mé paroli sarannu di meli,
pi ricurdari lu tempu passatu,
ma 'n'menzu ci sarà l'amaru feli
contru 'st'amuri ca fù veru 'ngratu !!
Amici, s'a viriti pi la strata,
diciticci ch'è donna scillirata !!

DUMANA DI MATRIMONIU

Un gnornu a 'na mati di famigghia,
si ci presenta un beddu giuinottu,
dicennuci ju vogghiu a vostra figghia
picchè 'nni sugnu 'nnamuratu cottu.

La mati ci rispuse, ma cu siti ?
d'unni viniti ? ca nun vi canusciu !
Signura, mi dispiaci, nun sapiti
ca sugnu lu nimicu di lu scrusciu ?

Sugnu 'ngigneru ossidricu notturnu,
meccanicu di gran pricisioni,
scassu tuttu, senza chi mi cunfunnu,
di nicu fazzu 'sta prufissioni !

Li cassaforti e li saracineschi
li grapu senza fari tanti stenti,
e restu mali dopu tanti rischi
si certi voti nun ci trovu nenti.

Mi piaci fari lu pristiggiaturi,
fazzu spariri roggi e portafogli,
amicu sugnu strittu d'è Prituri,
picchè canusci tutti li mé 'mbrogghi.

Tutti li Magistrati e l'Avvucati
sannu lu 'ngegnu miu, la mé bravura,
e quannu nun si virinu circati,
è picchè sugnu a la villiggiatura !

A Favignana e a Portulunguni,
cì vaju spissu pi mi ripusari,
vi dicu chistu comu paraguni,
cha a vostra figghia m'ha putiti dari.

'Ngnursì, nun mi dispiaci 'stu partitu,
però, quantu 'ni parru a mé maritu !
Chi fà vostru maritu di misteri ?
E' Marasciallu di Carrabbinieri !!

Allura si lu viu lu canusciu,
e jddu forsi mi canusci a mia !
Intantu mi nì vaju cà sentu scrùsciu,
e ccà nun vegnu echiù Signura mia !!

'NA SIGNURINEDDA MUDERNA

Cumparuzzu, vi putiti vantari,
aviti 'na soru ch'è veru bedda,
guardannula li sensi fà vutari,
ma piccàtu ca troppu nicarédde,
si misi troppu a vista 'ntra u paisi,
e sàcciu puru c'havi gran pritisì.

Cci piaci a vistirisi di lussu,
tutta scullata, li puppi spurgenti,
truccàti l'occhi, li manu e lu mussu,
e la minigonna cumprumittenti,
quann'è chi guarda cu l'occhi appuntati,
pari ca spara tanti scupittati !!

Mi ricordu quann'era picciridda,
era tunna, 'na trottola parìa,
li genti la chiamavanu pupidda,
ora crisciù e tutta si nachìa,
era minuta, una vera gioia,
ora è 'ngrassata ca pari 'na troia.

Sàcciu ca voli fari la modella,
e penza d'irisinni a Milanu,
si ci rinesci chista scappatella
nuddu lu sapi 'zoccu fà luntanu !
Cumpari, la pinzata non è strana,
d'acussì sulu pò fari la . . .baggiana !

Si davveru pigghia 'sta carriera,
cu sapi quantu posi avi a pigghiari,
jdda ca passa comu furastera,
vi giuru c'havi cosi di scialari,
beatu vui c'aviti 'sta soru
ca pi davveru vali un gran tisoru !

LA CIMICIA E LU PULICI...

Un ghiornu s'incuntrarù pi la via,
chiuveva e circavanu riparu,
sì nnì traseru dintra 'nà putia
unni chi c'era un poviru scarparu.

Lu pulici faceva lu ballettu,
la cimicia circava fari prisu
e lu scarparu nun'avìa risettu
pirchè si ci 'nfilò 'ntra la cammisa.

Dù puvireddu aveva lu manciù,
pareva c'abballava lu « spirù »,
la cimicia chiù 'nfunnu si 'nniu
lu pulici vulò e nun ci fù chiù.

Lu pulici e la cimicia pinzava
c'avìa ristata ddà, bona 'ngargiata
e pinzannu la fini si scialava
sapennu ca murìa scafazzata !

Inveci la mé morti è signurili,
mi pigghianu cù gran dilicatizza,
cu ddi manu di sessu fimminili,
mi pari ca mi fannu 'na carizza.

Mi mettinu 'ntra chianta di la manu,
dda l'ultimu salutu jò ci dugnu,
mi dicinu nun scappi tabbaranu,
e dopu mi scafazzanu cu l'ugnu.

I DELITTI D'ONURI

(*Dialugu*)

Secùnnu vui, cumparuzzu caru,
quànnu un omu a casa si ritira,
e trova natru omu a lu pagghiàru,
curcàtu cu ssò mogghi in cumpagnia,
ci avissi puru scusa dumannàri,
picchè li vinni certu a disturbari !

Poi ci tocca d'invitarlu a cena,
uffrènnucci liguori e pasticcini,
picchè chidd'omu ci ha fattu pena
a disturbarlu prima di la fini !
A la mughéri nenti cci pò diri,
la liggi ammètti corna di piacìri !

Si l'ammàzzi pi causa d'onuri
veni cunsidiratu 'n'assassinu,
un scilliràtu, un'omu di turrùri
e v'àngalera pi malu distinu.
Chi bedda liggi c'hannu dicritatu,
resti curnùtu e puru carciaratu !

Pi cuntu miu nun mi pari giustu,
sugnu sicilianu a doppia suola
e si me mogghi sgarra pi ssò gustu,
l'ammazzu a tutti dui cu 'na pistola,
di pò si viri 'nzoccu c'è da fari,
sidd'è lu casu d'iri in Tribunali !

Caru cumpari, siti furiusu,
ju pigghiu li cosi a la leggera,
si mé mogghi ha fattu qualchi abbùsu,
chi m'avissi accattari la galera ?
Avutru chi pistola, caru cumpari !
Li cosi mei sunnu di cuntari !

Pi mé mugheri c'havi tanti amici,
pi mia ci voli 'na mitragliatrici !!

LU STIPU DI ME' SOGGIRA

Mé soggira havi un stipu beddu assai,
piccatu ch'è tanticchia vicchiareddu,
guardannulu ci dissi, comu mai
'stu stipu vecchiu si manteni beddu ?
Ma idda mi rispusi: Tabbaranu,
bannera vecchia onura capitanu !!

Chist'è fattura antica, mi rispusi,
e cu lu fici era mastriceddu,
pò m'ha sirvutu a mia pi tutti l'usi
e cu lu varda dici, è veru beddu,
bon'arma a mé maritu ci piacìa
e veramente beni ci vullia.

Avia raggiuni ch'è 'na meravigghia,
si viri ca fu bonu fabricatu,
senza c'offennu chiddu di sò figghia
ca puru comu doti m'à purtatu,
però ogni cosa è sempri simpatìa:
Mi piaci megghiu u stipu di vossia.

Li cosi antichi hannu chiù valuri
e nò 'sti cosi fabricati d'ora
ca si li guardi boni, sull'onuri,
sù brutti dintra e beddi sù di fora.
Lu stipu miu, quantunqui strapazzatu,
ma è sempri lignu anticu e stacionatu !!

LA CONFESSIONE

(Dialogo)

'N'omu si vosi iri a cunfissari
pi qualchi piccatucciu chi tinìa,
lu preti ci rispusi, pò parrari
ju sugnu cà pi sintiri a tia.

Patri, tempu di guerra, in casa mia
ammucciari un ebreu pi salvarì
ca li Tedeschi cridivanu spia,
e prestu lu vulivanu ammazzari.

Figghiu, hai fattu un gran duviri,
ci dissi tempu nenti lu parrinu.
Però m'ha datu decimila liri
ogni ghiornu pi manciari e vinu.

Certu sunnu assai, dissi lu preti,
ma siccomu tu ti sei rischiatu,
ju t'assolvu, d'accussì ti cucti.
Però 'n'atra cosa nun ci haiu cuntatu.

Parra figghiu, tu nenti m'ammucciari !
Dicu una cosa ca l'ebreu nun sapi,
ci lu pozzu giurari 'nnanzi a Diu,
nun ci haiu dittu ca guerra finìu.

L'ULTIMU SALUTU D'UN POETA

Amici, sugnu fattu vicchiaréddu,
ed haiu misu lu peri a la via,
la falci è misa avanti lu purtéddu,
pi diri: sugnu cà, veni cu mia,
perciò prima c'arriva 'stu minùtu,
vi vògghiu dari l'ùltimu salùtu.

Prima cosa, li fimmini salutu,
artéfici d'amùri e gelosia,
sunn u jddi chi m'hannu suggerùtu
l'ardénti amùri di la poesia,
jò vi salutu fimmini sciacquàti,
d'unni qualunqui puntu vi truvati.

La fimmina m'è stata di cunfòrtu,
'ntra li muménti mei tristi e amàri,
perciò è granni l'amuri chi cì portu,
di nun putilli mai dimenticàri,
salutu li mé figghi e mé mughéri,
ca da mé casa sùnnu li bannéri !

Salutu li muntàgni e la campìa,
tutti li ciùri simbulu d'amuri;
duvenu fari una curtisia,
salutu a cù m'ha fattu tantu onùri,
salutu la Sicilia gran tisòru
onuri e vantù di la « CONCA D'ORU ».

Làssu la mé chitàrra 'ntra 'na gnùni,
mi fù cumpàgna di li sirinàti
a Luna chiàra, sutta li balconi
quànnu cantàì canzùni appassionàti,
quanti ricòrdi, quanta nostalgia,
tristizzi e giòi di la vita mia !!

Salutu puru cu mi vosi mali,
forsi pì 'nvidia o pì gilusia,
e si nun vennu a li mé funeràli,
mi fannu veru 'na gran curtisia,
mi bàstanu li fimmini d'apprèssu,
mi pari ca li viu, sutta un ciprèssu !

Làssu li versi mé a li quattru venti,
forsi cì n'è pirdùti a la stranìa,
sarannu li gran spassi di li genti,
essènnu fruttu di la fantasia,
di 'stu puéta pocu numinàtu,
chi dopu mortu, veni ricurdàtu !

Salutu li puéti comu mia,
amànti di 'sta terra Siculàna,
'sta terra di profùmi e poesia,
dimòra di la fimmina baggiàna,
e ora, mentri aspèttu la mé fini
appròdu varca e depòngu rimi !!

L'AUTORE

*Addiu libbricéddu miu,
ti mànnu a la stranìa,
ma sìddu fà furtùna
ricòrdati di mia.*

NINO LA MANTIA

I N D I C E

Fantasia di Poeta	pag. 8
La Siciliana	» 10
Parla la Statua di Dante Alighieri	» 11
Finestra chi lucivi	» 12
Donna Mara e mastru Titta	» 14
Senza cori	» 15
Un scarparu a Candidatu	» 17
A chidda chi m'intenni	» 19
Biddizza rara	» 20
Fimmina vili	» 21
Li curnuti volontari	» 22
Mi vogghiu cunfissari	» 23
Estremu salutu	» 24
Un 13 invintatu	» 25
Latru donuri	» 26
S'appurò la malatia	» 28
Vurria	» 29
Lu sapi Diu comu finisci	» 31
Donna Sara la pastara	» 32
Figghiu di nessuno	» 32
Cu rumpi paga	» 33
Stidda d'amuri	» 35
Dialugu fra dui cummari	» 36
La mia vecchia balia	» 37
Un maritu lagnusu	» 38
Lu Finanzieri	» 39

Un cunsigghiu	pag.	40
'Na missa di suffraggiu	»	42
Lu guardaporta miu	»	43
L'ultima scena	»	45
L'Eredità	»	46
Lu vecchiu Picuraru	»	48
Lu sbarcu di l'Americani in Sicilia	»	49
Mi lu vò diri.....	»	51
Lu ricattu (<i>Dialugu</i>)	»	52
A li ciuri	»	54
Un cuncertu musicali	»	54
Cara mamà.....	»	56
Vint'anni	»	58
La pillula pruibita	»	59
Parru pi certi fimmini	»	61
Finistredda chiusa	»	62
Occhi beddi	»	63
'Na casa di musicisti	»	64
Scumunicata	»	66
Lu surdatu rifurmatu	»	67
Quannu ti canuscivi	»	68
Avvisi Economici	»	69
Fimmina scillirata	»	71
Dumanna di matrimoniu	»	73
'Na signurinedda muderna	»	74
La cimicia e lu pulici.....	»	76
I delitti d'onuri (<i>Dialugu</i>)	»	77
Lu stipu di mé soggira	»	78
La confessione (<i>Dialogo</i>)	»	80
L'ultimu salutu d'un poeta	»	81
L'Autore	»	83

Tipografia LAMIA
Corso Vitt. Em. n. 159 - Tel. 22.066

TRAPANI
1970